

POZIVNO PISMO
MEĐUNARODNA NAUČNO-STRUČNA KONFERENCIJA
“Pedagoški kompas u medijskom labirintu: prilike i izazovi”



Poštovani/e,


zadovoljstvo nam je pozvati Vas na prvu međunarodnu naučno-stručnu konferenciju “Pedagoški kompas u medijskom labirintu: prilike i izazovi”, koja će se održati od 23. do 25. oktobra 2025. godine na Univerzitetu u Sarajevu – Filozofskom fakultetu.

Konferenciju organizuje Odsjek za pedagogiju Univerziteta u Sarajevu – Filozofskog fakulteta, u partnerstvu s Regulatornom agencijom za komunikacije BiH i Fondacijom za razvoj medija i civilnog društva „Mediacentar“. Ova konferencija predstavlja centralni događaj ovogodišnje kampanje „Dani medijske i informacijske pismenosti“, koju priprema Regulatorna agencija za komunikacije BiH, u saradnji i uz učešće članica Mreže za medijsku i informacijsku pismenost.

U fokusu naučno-stručne konferencije nalazi se važnost medijske pedagogije te medijske i informacijske pismenosti, s posebnim naglaskom na pedagoški aspekt – odgoj i obrazovanje sa i za medije, kao i razvoj kritičkog mišljenja kod djece i mladih, odraslih, stručnjaka različitih orijentacija, ali i šire društvene zajednice.

Cilj konferencije jeste razmjena iskustava i istraživanja o temama koje u fokus stavljaju čovjeka u svijetu savremenih medijskih izazova, uz temeljitu analizu uloge odgoja i obrazovanja u digitalnom dobu. Mediji i društvene mreže predstavljaju fragmente stvarnosti s kojima čovjek svakodnevno ulazi u interakciju.





Kako bi se pojedinac osposobio za smislenu interakciju i promišljeno samooblikovanje kroz te interakcije, nužna je prisutnost odgajatelja koji će pedagoški voditi i usmjeravati ka odgovornim i kritički osviještenim pojedincima. Čovjek ne smije biti prepušten “a game of chance” u medijskom labirintu današnjice niti spoznavati svijet oko sebe kao izolirani subjekt ili pak autodidaktikus – potreban mu je pedagoški kompas. Medijska kompetencija danas je neophodna u digitalnom društvu – kako odgajateljima, tako i odgojenicima, kako odraslim, tako i djeci, kako zrelim tako i mladim osobama. Konferencija pruža priliku za razmjenu ideja te stručnih i naučnih iskustava s ciljem afirmacije medijske pedagogije.

Pozivamo Vas da svojim aktivnim učešćem u naučnim i stručnim raspravama doprinesete daljnjem unapređenju i razvoju ove oblasti, kao i zajedničkom oblikovanju novih pravaca u obrazovanju i društvu.

Bitne informacije i datumi:

Na plenarnim susretima i kroz tematske sesije pružit će se prilika za predstavljanje novih uvida u istraživanja, teorijska promišljanja, refleksije o različitim odgojno-obrazovnim situacijama, kao i primjere iz društvene stvarnosti. Na *Sajmu dobrih praksi i radionica* učesnici će predstavljati najbolje primjere iz učionica, odgojno-obrazovnih prostora te različitih medijskih, bibliotečkih i kulturno-umjetničkih okruženja.

Konferencija će se održati u prostorijama Univerziteta u Sarajevu – Filozofskog fakulteta, na adresi Franje Račkog br. 1.

Prijave za aktivno ili pasivno učešće na Konferenciji moguće je izvršiti putem linka: <https://forms.gle/gzQinNpafHuA8Guq9>

- Prijava učešća i slanje sažetka: 10. 7. 2025.
- Potvrda učešća u konferenciji: 25. 7. 2025.
- Slanje cjelovitih radova: januar. 2026. godine.

Sažetak (do 350 riječi) pišete na bosanskom, hrvatskom, srpskom i engleskom jeziku. Sažetak treba sadržavati temu, ciljeve, metodologiju, rezultate i zaključke istraživanja. Uz sažetak prilaže se pet ključnih riječi.

Prijavljeni sažeci i radovi prolaze dvostruku slijepu recenziju. Radovi će biti objavljeni u Zborniku radova Odsjeka za pedagogiju Filozofskog fakulteta Univerziteta u Sarajevu. Zbornik radova indeksiran je u EBSCO i dostupan je u CEEOL (Central and Eastern European Online Library). Upute



za pisanje radova bit će poslane prilikom potvrde o prihvatanju sažetka. Više informacija o Zborniku možete potražiti na linku:

https://ebooks.ff.unsa.ba/index.php/ebooks_ffunsa/catalog/series/pedagogija

Službeni jezici konferencije su: bosanski, hrvatski, srpski i engleski jezik.

Predlažemo moguće tematske oblasti:

1. Uloga medija u odgoju i obrazovanju
2. Učenje i poučavanje u medijskom okruženju
3. Osnaživanje medijske kompetencije nastavnika
4. Medijska kultura i umjetnost
5. Digitalna transformacija u obrazovanju
6. Medijska pismenost kao obrazovni imperativ
7. Medijska pismenost za digitalno sigurno okruženje
8. Mediji u (naj)boljem interesu djeteta
9. Inovacije u obrazovanju: digitalni alati za 21. vijek
10. Mediji kao resursi za osobni razvoj u slobodno vrijeme

Za sva dodatna pitanja možete nas kontaktirati putem email adrese: pedagoski.kompas@gmail.com

Radujemo se Vašem dolasku i učešću!

S poštovanjem,
Organizacioni odbor

